

内

臺

集

內臺集卷之五目錄

雜文八首

送劉伯山之廣靈令序

送蔡半洲先生巡撫山東序

送九川呂先生巡撫遼陽序

明故資政大夫南京戶部尚書贈太子

太保莊敏許公墓誌銘

栗應宏道甫字說

明故 敕封承事郎南城兵馬副指揮

謝公墓誌銘

明故桂坡安徽君墓碑銘

應制集序

內臺集卷之五目錄終

內臺集卷之五

浚川王廷相著

後學王光濟門人劉希杜校

雜文

送劉伯山之廣靈令序

門人任丘劉永阜伯山者得廣靈令而有憂色
浚川子曰何爲憂者伯山曰吾學先生之道得
其一隅而不達其二執其所素立而不能叅諸
時變恐不調於政而宜民吾是以憂浚川子曰
牧民有道亦在得乎民之心而已民以財利爲

心故不欲多費民以安居爲心故常欲祛暴民
以樂生爲心故不欲煩擾使伯山之爲廣靈也
以儉自持而無藝科罰之不作則民之業利以
嚴爲治而暴橫強梁滅其蹟則民之良者安以
簡靜御事而里胥吏卒不擾於下則民之生樂
民樂利以安則生遂矣烏有不得其心者哉伯
山曰吾聞之廣靈邊國民寡而瘠與內地殊一
有不得已之政則怨興而不肖之心應之將柰
何浚川子曰不然地有不同而民之心則無不
同者我以民爲子則我爲父母此余之

已效於郡邑者而又何疑昔有山行者失路而墜於虎穴卧虎子側自分爲虎食矣及虎至見其俛伏不動探視其子安而無恐知非害其子者乃負其人出穴夫虎至惡者以無害子之故而猶欲生其人况民我同類使我之政誠無害其民焉而民又恐有不肖之心以及我者哉故曰民無刁良惟政翕張伯山其圖之

送半洲蔡先生巡撫山東序

浚川子曰今之治乎外者莫重於巡撫矣兵馬之鈐攝錢穀之調度官吏之督率地方之安輯

德意之敷宣生民之休戚舉萃於其身苟檢察
不周則弊滋於隱微處措失宜則變生於意外
夫豈不重乎哉雖然乃所先務而要急者亦在
去乎害民者而已矣財者民之心貪吏則攫而
奪之生者民之命酷吏則暴而戕之心傷生促
民乃大苦豈不喪其樂生之天乎由是爲逆上
爲獷悍不率爲橫劫之忍爲法理之罔制爲國
本之蠹不謂貪酷之吏致之哉諺曰械虎弄狼
乃存爾羊今之所以撫民者將不急於是可乎
夫務爲容悅者巧於許穢之掩信夫虛飾者慢

於實行之嚴此明察周諏之政失而黷貨刻刑
之跡得以匿而不彰矣貪酷之吏不亦遂其穿
窬之竊乎不直竊其財而又竊其名終也並其
美官而竊之不幸而敗露者特十之一耳然亦
盈橐而樂去矣夫吏據乎勢者也民制於勢者
也勢之所在無往不厭雖強梁者不敢於控愬
而况良弱之民乎斯人也自其體貌議論觀之
出入賢智孰非君子而中心之隱微踪跡之秘
密則不可遽測矣下焉者不敢於赴愬以直其
惡上焉者又不得易知以行其黜罰此貪酷者

所以縱肆而無忌也嗟乎今之時此風熾矣放
濁苟得流遁忘返久之將爲國害使撫民者於
明察周諏之政無失焉則二吏自除仁惠之澤
播及黎元安於田里愁歎不作矣可以無梗化
可以無流逋可以無盜劫可以無奸宄可以尊
主可以敵愾可以興禮樂可以復堯舜之俗不
然雖勞心庶績兢兢有爲其爲治也亦末矣謂
知先務乎哉邇者山東巡撫員缺 皇上乃
簡命大理蔡公往蒞其政六科諸君子舉同官
故事徵余言爲公贈余從法司後日恒接公見

公容止端凝閑以禮則處物誠恕不矯飾以拂
論事侃侃不流不阿咸中時措已知公爲用世
之賢矣乃茲捐循山東持是而往足矣又奚俟
於余言公名經字廷彝半洲其別號云

送九川呂先生巡撫遼陽序

九川呂子在雲南左轄時爲言者排誣候勘家
食者已八年矣乃今年始得奏白樊棘之點昭
雪心跡之素無玷吏部乃起呂子適遼東巡撫
缺員遂以呂子應薦上乃俞允呂子昔爲諫
官風節侃侃不畏權貴出爲藩臬所至有治聲

以故 命下之日朝士皆快之不亦賢乎哉呂
子與浚川子友善乃問曰嗟乎久矣予之棄於
世也滅響掃軌遂與世棄宜矣乃復抱牒而來
不亦重外而畔於守道乎予實汗顏爲之自夫
逆竄丘壑世事踈鈍惟野僻與宜乃今荷茲重
任不亦寡陋而弗濟乎予實殷憂之懷浚川子
曰不然良驥困於鹽車明珠詫於按劍君子雖
有絕倫之才亦無以自效使伯樂賈胡一過而
哥之則歷塊照乘可以運掌而致當是時也道
在得行雖聖人亦不得而辭之故曰非其時則

龍蛇遘其會則雲雷此聖賢酌時出處之大節也而子何之歟且夫憂懼者致治之根柢也研慮者成務之郭廓也集衆思廣忠益孔明以之相蜀善方畧圖群策營平由之服羗故曰臨事而懼好謀而成又曰功崇惟志業廣惟勤此豪傑所以經營四方也而子何之疑雖然政有已然之故舉君子斟酌劑量多歷年所之所遺也況今之邊圉非昔之郡邑今之夷虜非昔之庶氓挈之俗而俗安叅之治而治達足矣非有大利害大蠹蠱以繫乎安危之幾苟作意而更張

之是採擷爾顛越爾謂之拊循將柰何故曰賢者不立異以要名智者惟因時以求治此周公監于二代因革損益通百世而可知者也呂子其圖之

明故資政大夫南京戶部尚書贈太子

太保諡莊敏許公墓誌銘

嘉靖十三年正月乙卯資政大夫南京戶部尚書許公卒于位訃聞 皇上嗟悼乃 贈太子太保 賜諡莊敏遣官諭祭營葬事 恩典優備弟戶部尚書松臯公以廷相雅知公乃持右

通政杜子材所撰狀來乞銘嗟乎神遊九寰公
已長逝乃若德茂人群言垂世則裨贊帝猷式
標風化誠不可無述按狀公諱誥字廷綸別號
函谷河南靈寶人也厥遠祖伯夷爲堯四岳至
周封其裔文叔于許子孫以國姓其在隋唐宋
元譜牒可稽者余於公大王父碑銘已叙其畧
茲不述高祖士信配陳氏曾祖實贈戶部左侍
郎配焦氏贈淑人祖聚安定縣教諭累贈戶部
左侍郎加贈刑部尚書配何氏累贈夫人父進
吏部尚書贈太子太保謚襄毅前母張氏累贈

叔人舟高氏累贈一品太夫人成化辛卯十二月六日太夫人夢巨蛇入室覺而生公在童齡岐嶷不群長而機神警朗望見之者無不美其奇偉十歲治大小戴禮便能屬文弘治乙卯與松臯公同舉于鄉己未登進士第庚申選授戶科給事中奉命清理延綏倉場檢閱精嚴不避權貴時有苗中官者出督三邊貪縱罔法怨聲嗷嗷公即劾其狀邊人懷之乙丑陞刑科右給事中屢疏上時務其均考察便解納備要害數事迄今行之正德初朝廷以舊德遺老起

襄毅公爲大司馬公例宜避言路改翰林院檢討奉命教司禮監宦者戊辰襄毅公爲太宰直弗嬖阿中人亦弗敢干以私逆瑾忌之乃欲公納交以通公出入書堂絕跡瑾門戶瑾乃大怒曰謂我不能制爾邪乃矯詔黜襄毅公籍罰邊儲三百石竄公廣西全州判官欲置之死公歷險冒瘴與魑魅伍挺挺無戚容竟宜風土然納言無恙庚午襄毅公卒公奔憂制終即宦情泊如矣太夫人屢命之出公乃謂松臯公曰出處道殊動默緣性在各任其真耳予鮮合於

人茲豈厭時侍太夫人優游以樂足矣汝含醇
居宏無往不可勉哉自是閉門掃軌潛修逖覽
嚚嚚聖真罔深弗入乃遂受徒講道若將終身
焉父之都御史張公禮周公倫陳公鳳梧王公
蓋監察御史朱君寔昌張君鵬交章薦公大要
以公探賸研微見道淵邃可備顧問不宜置之
閒散時有 詔守正不阿爲昔逆瑾所斥者錄
之遂起公爲尚寶丞非其意也復疏病還十餘
年來公養晦存神蠖屈林藪松臯公兼善匡時
龍翔天漢一出一處時人兩高之壬午 今上

改元復起公爲南京通政司叅議公曰堯舜在上夔契思奮斯其時也乃起從仕時講理學者北稱公南稱王陽明故公入南都一時江南士人多趨席問難以聞所未聞咸傾心焉丙戌帝以文學侍從弗克經幄命輔臣各舉所知公被薦改侍講學士戊子爲經筵講官素養閎博樂遇明上乃進講多所剴切據經引史出仁入義古昔興衰治忽之跡如指諸掌帝皆虛懷聽納退而加獎復上緝熙聖學四事一曰則圖書以明道原二曰主聖經以求道是

三曰辯諸儒以祛惑四曰屏雜說以防道害
其於尊經崇聖闢邪衛道無不至焉 帝以公
留心理學益加眷注己丑 命公主武舉試事
尋擢太常卿掌國子監祭酒事公以道範久頹
化機弗振乃弘獎風節絀抑華競以經世爲士
笈尊德爲學軌故一時人士翕然化之不徒敦
悅典墳涉志弦誦而已時太學生有遐方旅襯
暴露無歸者幾三十人歲時名字漫滅罔稽公
乃以公帑羨餘購地葬之復察生理窘迫衣食
弗給者數十人咸加賙卹由是生徒感德懷服

又奏罷教職不稱者二人及劾勲戚習禮不律者乃一時成均條約肅然政觀因災異乃上乞祭天道以平治道疏其畧云大君爲天下神人之主情發中節斯用人行政順應天心陰陽和而風雨時矣 帝嘉納之先是 文華殿有孔子塑像 帝欲從古易以木主公乃以所著道統書上之 帝悅即撤其舊像立皇帝王師八主南向周孔二主東西向命輔臣與公九人瞻拜主前面諭之曰朕奉先聖先師于此庶起敬慕以遜志于學卿等其罔朕棄仍 賜茶及禮

神品物復 命各爲講章以進公衍中庸喜怒
哀樂章入講 帝謂公欲以一人之情通天下
之情所言良是自後月朔望 帝必躬祭事品
物必 賜公以爲常辛卯 帝開講無逸殿宴
豳風亭公與焉明日公以無逸篇中宗受命敷
之講義以進謂民者天之心天心不離乎民中
宗以天命度其身以身治其民所謂欽崇天道
永保天命也 帝善其說壬辰擢吏部右侍郎
時天下入 覲公門戶清肅人弗有私謁者嘗
謂官之失德寵賂彰也况干涉公事以敗名憲

乎乃具奏以戒諸司 帝從之復上疏乞休
帝不允尋擢南京戶部尚書公與松蘿公居兩
京大司徒又出襄毅公之後父子兄弟並至八
座前此未有縉紳榮之公蒞事無私與物以誠
雖議論激發而儀度宛綽僚屬靡不敬服有司
厨軍陳秀者五百餘人以例更調營操而糧賞
若不及各營軍士公與具奏增之他如倉場之
弊無益之費多見裁省復上疏乞休 帝以留
都國計非公弗可不允甲午春二月公將 朝
賀如京忽一夕痰疾作卒享年六十有四嗟乎

襄毅公有偉烈于 王室有德澤于蒼生有氣
節于名教公克肖之可謂無忝爾所生矣初娶
呂氏累贈夫人繼娶李氏今繼陳氏累封夫人
子四佖佖仁儆佖先公一年卒女四一適楊寅
一聘侯鳳二尚幼公天性孝友仁厚襄毅公疾
昏旦弗離寢所服不解帶恒露禱于天疾愈始
已及卒哀毀骨立幾至滅性事太夫人依依左
右不忍離及遊宦違養累䟽陳情乞歸 帝亦
感公孝思嘗稱卿切切以親老爲念云襄毅公
卒後公尚有五弟未成及與松臯公日夕訓正

授以程式今廷載居鄉有令聞廷陳舉人廷章
知府廷錄國學生廷議職方司主事皆彬彬以
文章政事爲時聞人昔公受業師張公歿已十
年餘矣貧弗能葬公至南都捐數金經理其事
爲銘葬之仍卹其家邑俗婚姻重財公刻意化
之乃其女歸聘自酒幣外一無所取今舊習章
章變矣其敦重人倫以身率世多類此公平生
不數數於文筆惟以踐諸實行達之世務爲學
嘗曰聖賢所傳心法六籍所遺訓典要在用世
緩人耳苟無益於時文將奚爲若公者謂之經

濟之儒非邪惜乎天不假年柄用以酬其志耳
所著有通鑑前編圖書管見道統源流詩考易
叅春秋易見中庸本義太極論性學編等書咸
體認精確論究詳盡弘益道術融通性命至哉
浚川子曰宋儒力詆虛無以排二氏及自爲論
亦以太極人性爲理墮於佛老而不自知後學
習染深稔不能研慮攝契以辯真妄遂至淪胥
爲世太迷聞荒雞而鳴焉適其時拾唾核而啖
安知其味不有豪賢以呼招於世則道日支離
將與二氏空虛之學同宗祖並塗轍矣豈不可

傷公乃論太極曰氣理兼備不涉於無論性曰
理氣渾全本無支離俱不可專以理言斯擬也
詮擇精真解惑千古卓乎命世之見矣正德末
余行經靈寶會公談及諸儒理氣神性之誤公
曰辯此何難若是除去形氣直問宋儒要那神
與性理何處安頓便了乃與公相視大笑或議
公撤孔子塑像嗟嗟泥俗之見安可與論崇古
之道銘曰

大氣韞靈維嵩及河毓茲儒英高明含和履道
冲邃守貞深固出自纓簪風儀撲素褻毅巖巖

勲在鼎常公乃克肖于闕有光漢之玄成宋之
純仁世濟厥美八公實與倫人有恒言主不易逢
公際 聖明特契淵衷有懷斯亮有言斯從光
贊 衮黼懋昭其忠煌煌明哲旁燭世塗大易
動靜恒與時俱時非我與從吾所好栖跡丘樊
耽靜味道時會純熙雲龍附儷志存兼善驅馳
拯世大雅中庸卷舒合聖不執不流循道俟命
鴻儀貞觀恢映函夏彼狷介者亦奚足詫去聖
日邈作者伊誰不有豪賢道日以離探求氣本
爲理自出遂使儒宗罔惑老釋太極性理卓有

遺篇匪余之私百禩之傳

栗應宏道甫字說

上黨栗生應宏其友字之曰道甫將以大儒之造期之也浚川子爲說其義曰嗟乎道非玄遠支離者近在几席而切於日用君子能察諸人倫皆當其可閑諸名教不爽其則德性靜定與天爲徒智慮深潛惟正而動又能於窮通得喪死生禍福之際安於義命而不亂則人道盡而足以軌物矣此之謂道本然亦非徒治已而已會其時乃以濟世其大者開物成務制作禮樂

闡皇王之猷標民物之準堯舜其君民而恭贊其化育其極也三光完而四時和風雨調而惠氣襲嶽無震石海不揚波百川順流土不昏墊華夏寧而九夷八蠻服四靈至而鳥獸魚鼈若此之謂道業乃其推行之機非定途死局可以率循者有經權開闔屈伸消息遠近取舍之宜惟神於應變者乃能動中厥會而以時出之故功業所就由近及遠可大可久此非膚淺迫切之儒可得而與者故曰與天地合其德日月合其明四時合其序鬼神合其吉凶此之謂道樞

夫本以立其體業以達於治樞以劑量於時措則先王之神化修六籍之大訓顯可以植三才可以資品彙而道之實宏且廣矣世儒崇尚虛靜而無明物察倫之學刻意文詞而後輔世和民之績則於仲尼門逕荒哉遐矣謂達諸道何啻霄壤栗生近與余遊見其德性謙冲文章古雅世若寡其儔者苟不達於道亦汨歿於世儒焉耳矣於其別也乃以道之實際告之且爲顧名思義之一助云

明故 敕封承事郎南城兵馬副指揮

謝公墓誌銘

公名東字孔陽姓謝氏懷慶河內人也其先系
出大梁有諱唐臣者於公爲高祖勝國時爲大
名路總管府判至正末海內兵起以梁地平曠
受兵戰非子孫乂燕之區乃西胥宇得懷之河
內清化鎮嘆曰形勝哉此方也東阻石梁西隘
丹河北面太行南臨沁水庶幾兵馬不至矣腴
哉原田流泉感沸修篁佳果黍稷杭稻美兼江
南其庶幾生養無苦矣淳哉土風古樸是崇家
輯黨睦禮義行行其庶幾和善無訟簡矣遂遷

自大梁以爲恒居唐臣生矩矩生彬彬生謙謙
生公皆抱德沉寔蜚遁于野然廣田力穡奕葉
殷富門戶稱盛族矣公少失怙恃屹屹自立樂
善循理暗與道符真率坦易於世無忤且喜於
施濟閭里中有鰥不能娶貧不能葬者乃公即
給聘資棺斂此不可三四計矣卹人於不報之
途推利於無求之家此非義士好德者之惻隱
乎初病時語其子詔曰古有言之惟善者昌謹
爾儀敦爾心修爾業不可以息間毋驕毋滿毋
惰毋傲毋負 主上恩毋負爾祖德爾惟敬哉

此非知道者之訓乎與兄杲同居數十年友愛
如一日教育兄子寵如己子疾且革語侍者曰
候兄來化去皆以遠不得易知己而杲至執兄
手嗚咽久之曰手足之樂杳無期矣見兄可以
無恨遂卒嘉靖十四年五月十二日也距生於
弘治元年正月二十一日得春秋四十有八配
張氏生男子一即詔尚 獻皇帝次女 永淳
長公主爲駙馬都尉女子一適同邑趙永年先
是都尉受袍帶後 上即敕封爲承事郎南城
兵馬副指揮張氏爲備人終身 二命禮部

諭祭工部修繕瑩園以其年七月二十六日葬
安定門外永安庄從 賜兆也公以子然布衣
榮聯戚里荷茲 寵靈乃世所不易得者或曰
瑩域蔭之而然研岡杜子論之曰謝氏自唐臣
卜居矩卜瑩說者曰其父子乃獲景純青烏之
術遂昌後如此愚曰不然史載天人交應如萬
石君楊震之家不一而足今考謝氏自上世以
來忠厚一脉綿綿延延施及兵馬公守素抱一
黜巧隳利故能高大門閥也其都尉者亦豈專
乎貌也哉正能無忝所生耳矣顧當時應 詔

者奇偉男子亦夥矣乃遇不遇關其祖德之積
弗積耳是則謝氏之顯在德不在卜也較然矣
獨歸之風氣彼景純之後何如哉今都尉醇謹
日新克當上意 公主孝慈貞淑克承 內訓
將來子孫繩繩必有異才大賢與 國同休者
矣楊子雲曰史以天占人聖人以人占天何曾
言地嗟乎豈獨謝氏然乎哉浚川子乃爲之銘
銘曰

姻連 帝宅謝氏赫赫知天之祐德視茲 皇
澤佳城鬱蒼體魄允臧欲知公之良視茲銘章

明故桂坡安徽君墓碑銘

君姓安氏名國字民泰別號桂坡常之無錫膠山垓村里人也其先有諱茂者本玄朱舊裔孟信之子洪武中來繼于安明善氏是爲君之高祖生以恕以恕生公俊直行儻言爲邑聞人公俊生祚號友菊剛方不阿動循禮則事親以孝謹稱教子姓先行而後文安氏世業雖裕而大其門者則自友菊翁始配司馬溫國文正公十五世孫達之女生二子長邦字民本次即君生而體貌魁梧資性通朗有識度料事輒中幾宜

兄卒時友菊翁老矣門戶單弱百侮紛至君方弱冠卽力承幹蠱內而綜理家務井井有條外而處物周恕忻忻無怨若老練於世故者宗戚咸加嘆賞曰安氏有子矣友菊翁平生悅在山水間君乃刻意承順嘗曰大人日暮無以樂其心豈予所以養志乃於居隙爲園圃構亭池集竹石蒔花卉時而速客觴詠備極爲樂之具亶亶不憚煩友菊翁陶然遂其桑榆之樂者皆君克養致之蓋大孝之遺芬而澆俗之僅見者也兄與其子如崇皆早逝君撫其遺孤爲之禦外

侮助徭差導之禮義俾之自樹無間已子毘陵
城圯當道議修之窘于費君首捐私帑爲郡民
先歲侵吳民饑君輸粟若干石爲諸大家倡自
毘陵及旁郡所賴以全活者甚衆宗黨之貧與
鄉之故老皆月有給歲有贍死不能葬負無所
償者君多給之棺斂折其券書其仁及鄉黨義
先官府多類此白茅水利之役巡撫梧山李公
方以艱大爲憂詢方畧於君君乃述督理之宜
疏導之次勸懲之法若干事上公由是官有程
式民樂趣事迄于底績海寇竊發殺人攘貨大

爲居民患中丞松月伍公仗鉞臨江將往平之
命邑大夫致君幕下時議欲以官軍直擣其穴
君曰左矣賊恃海爲亂出殄鯨波若履平地此
彼之長技我軍涉險而戰非所素習自顧不暇
安能致勝莫若誘其黨與使自執其渠魁易破
也公從之寇遂平君平生好讀溫公通鑑朱子
綱目等書故於往古治亂興喪之跡世運汙隆
之辯靡不歷歷如指諸掌作詩未嘗規步古人
而矢口成詠有晚唐諸人所不能道者嘗於友
菊翁菊樂園後築樂菊園以庸先志暇則捫友

徜徉其間時而酒酣興劇乃取李白遠別離蜀
道難等篇蘇長公赤壁諸賦歌之音調清遠流
風洒洒四座悄然傾聽如神遊崑閔不自知其
在塵宇也嘗云足跡未出門戶不能大觀遠覽
以廣志意爲天下士終齷齪吳儂死矣乃北走
京師循太行抵恒嶽躋岱宗謁孔林以觀闕里
之聖蹟已而泛大江躡匡廬陟武當遊於洞庭
之野冀聞軒皇奏樂之遺音復道荆溪而南登
龍池窮天目涉震澤訪蘇臺以弔闔閭之閭沒
而悲子胥之枉忠又自錢塘而東上會稽探禹

穴凌天台歷鴈蕩望東海之洋以求安期羨門
之儔爲之友遊各有記記各有圖圖各有詩所
過丹房梵刹留題幾遍返而喟然曰昔人謂塊
視三山杯觀五湖茲遊信哉嗟乎謂非振古之
豪能之乎嘉靖甲午正月忽遘疾醫弗奏功遂
不起是爲閏二月十六日也生於成化辛丑十
月二十六日享年五十有四配周氏男子七人
長如山登嘉靖己丑進士改翰林院庶吉士未
幾改知裕州次如磐太學生如石邑庠諸生如
京如岡如陵如嶽女子二長適興道華魯先卒

次適武進邑庠生鄭相孫男一希堯孫女三俱
幼以卒之明年某月某日葬于膠山之新阡如
山及諸孤泣血奉狀走介請銘以表隧石浚川
子曰余往在南都時君來謁余乃下榻與語稍
及時事君憤然高論舉能究其所以始而逆料
其所終如辯白黑不爽雖古通達政體者不能
過余已駭其非山藪之士矣及按狀見其遺裕
州書云官無內外清劇以稱職爲賢當道成汝
故以艱劇投汝汝惟守道俟時可也民有隱弗
卹則怨能體其好惡則悅悅則得民心得民則

得上賢者勞於四方之業而成一代之名其道
固有然爾矣汝惟慎哉由是觀之豈非明練成
務濟時之器乎使君登進辟命於朝推所素負
於政必大有可觀然竟止於草野疎散之豪惜
哉惜哉銘曰

俟俟徵君式德天啓匪義弗蹈惟賢是企孝友
無間履道敦倫厚及宗黨率禮施仁輕利如毛
達之者鮮匪君之豪奚是能辯偉哉曠逸末俗
拘鄙匪君之豪焉覩高士車良馬習足以馳坂
世不及用賢者攸歎七子蕃蕃玉璞珠淵裕州

崛起龍翔鳳鸞不顯于身顯及後昆匪君之仁
何昌厥源佳城戢戢膠山之阿坤靈禁訶日星
不磨

應制集序

少保桂洲夏公應制集綜之有七則曰樂章曰
詩曰賦曰頌曰致語曰講章曰奏札體裁區異
古格類殊質者簡以古豐者辯以則麗者典以
潤逸者暢以雅靡不精思內融神用外灼色相
詣極情致兼備真得六籍之膏液百氏之英華
矣公間出一編示余讀之三復作而嘆曰嗟乎

此可以觀君臣之相遇矣豈徒文之美云乎哉
自古人主好文者少人主能自文者爲尤少當
其時雖有瓌儒碩士茂三才之道韞九經之術
擅秘匱之文闡藏山之旨上無崇嗜亦無以操
觚自效矣洪惟我皇上聖睿聰明文思天縱
吐語成章揆辭會道每有制作古朴渾成參諸
典謨雅頌不約同軌蔚然人文宗統經緯區夏
矣豈非文運之嘉際乎是以內閣諸公及公得
以襲東壁之華應奎章之詔日數數焉供奉
宸遊則詠和篇什被旨撰言則對揚休美或感

天顏以褒嘉或蒙

聖筆以裁潤文之榮遇

何以尚此昔杜子美韓昌黎詞人之雄號稱絕
代跡其平生所作多羈人逐客流離淒楚無聊
之詞與夫贊述當時卿士大夫官履家乘之美
求如公之上贊禮樂仰和 聖製得以附麗

宸翰一不可得夫二子豈不能哉不遇故耳嗟
乎君臣相遇從古爲難得之者不可以虛辱也
所要在能共成治理耳書曰惟后非賢不乂惟
賢非后不食其爾克紹乃辟于先王永綏民古
之君臣相遇其大節如此少保公將亦卽心啓

沃卽事彌遠以紹保衡格天佑民之治余亦將
有堯舜明良嘉遇之頌以爲他日獻不直贊公
文詞之美而已也

內臺集卷之六目錄

雜文十一首

杜研岡集序

送世襲國子監學正孔先生序

栗齋曹先生配王孺人合葬墓誌銘

政言贈賈國珍

明故朝議大夫山東布政使司叅議陳

公墓誌銘

明故 敕封文林郎都察院司務常公

墓誌銘

送管君一初擢江西按察司副使序

明故封奉政大夫刑部郎中楊公墓誌銘

明故葉縣儒學訓導林菴周君墓誌銘
祭孫平泉年兄文

明故中憲大夫贊治尹都察院右僉都御史研岡杜公墓誌銘

內臺集卷之六目錄終

內臺集卷之六

浚川王廷相著

後學王光濟門人劉希杜校

雜文

杜研岡集序

浚川子曰文章衍道之具也要之乃聖賢可久之業文而茂所關繫徒言也故有道者恥之咸韶之歌墳索之撰世述文湮靡攸稽已而風雅典謨幸存執式觀其擬論中正義旨䟽朗人紀天道性情政理之外無淫獵焉越千億祀仰求

聖真此其衡準乎哉臨頴研岡杜子集其乙未
以前詩文若干卷乃以序問余嗟乎文章之敝
也久矣自魏晉以還刻意藻飾敦悅色澤以故
文士更相沿襲摹纂往轍遂使平淡凋傷古雅
淪隕辭雖華繪而天然之神鑿矣况志不存乎
道者其識陋情不周于物者其論頗學不經乎
世者其旨細由是而爲文乃於人也不足以訓
而况支贅滛巧以垢蟣乎風雅典謨之正乎是
故知言者病之矣今觀研岡之集氣冲筆健學
博思深吐語符道德發慮中經綸其見愈真其

機愈含其情愈切其言愈婉可以厚人倫可以植風教所謂人紀天道性情政理之外無文章者乃於是乎可觀且不爲凌駕嶮怪援取異端持辯堅白漁獵駁雜之談真得乎六籍之周行斯文之會通矣研岡子乃古之遺雅非乎語云清廟之瑟朱絃而疏越一唱而三歎有遺音者言其音致備極而不盡用若遺之也又曰文章得天地中和之氣則高不入於荒唐下不枯於凡近言闕深典雅澤乎道德之中也嗟乎此皆可以贊研岡矣

送世襲國子監學正孔先生序

儀封孔永肅先生乃唐褒聖侯德倫之遺孫其
先自寧陵徙此歲衍族大靡所統一奉今大宗
衍聖公檄爲林廟舉事以約束族人然未有衣
冠奉祀也嘉靖十三年冬先生乃具奏乞 恩
其疏云宣聖六十代孫林廟舉事臣承寅謹稽
首頓首昧死奏臣遠祖德倫系出孔子三十三
代嫡派子孫唐貞觀十一年由紹聖侯改封褒
聖侯食邑一千戶於河南寧陵縣沒遂葬縣北
褚垌村生二子長崇基襲侯次子歟世守墳墓

祭田奉祀家廟崇基子璲之傳至四十八代孫
端友當宋靖康中金人犯汴中原陷沒乃扈跸
高宗南渡仍襲衍聖公於衢弟端操在北金人
以衍聖公封於魯元與我朝皆因其裔封之
由是衢州與寧陵子孫悉同編氓矣正統中順
天府推官徐郁爲褒崇道學事奏行天下體訪
聖賢子孫褒錄浙江以崇基派五十八代孫公
剛舉河南以子歎派五十九代孫彥紀舉勘皆
德倫所遺嫡派子孫欽賜戶兵工三部勘合
優免各項差役爲儒籍正德中衢州府知府沈

杰以端友孫彥繩比照宋臣朱熹事例奏准
與翰林院世襲博士奉祀臣與彥繩皆出自德
倫一派子孫伏乞 賜臣博士庶得衣冠奉祀
有光聖祖臣不勝感戴 天恩之至臣承寅稽
首頓首昧死謹奏疏上 帝乃下禮部議今少
保尚書夏公等覆奏宜下河南撫按官覈實於
是巡撫都御史簡公巡按御史李君督屬體勘
稽之譜牒參之碑誌質之父老結之官吏無爽
乃會奏舉如承寅疏部上其議如彥繩例 帝
乃俞允與授承寅國子監學正世襲嗟乎豈非

曠世之典乎人有言曰德懋者慶長功懋者報
遠於惟我先師仲尼道德配天經墳垂訓啓萬
世君臣太平之業以爲生民安其功德所被宏
深廣遠蓋不啻天地之覆濤矣則夫聖君賢相
仰思聖澤世以厚其子孫夫豈不宜雖然要亦
會其時耳使君臣政體未備卽朝廷之上禮文
猶自踈陋而況前世久廢之典雖有賢智如不
能自拔何洪惟我 皇上敬一傳心中和體道
衍堯舜聖學之統闡先師存神之化求之歷代
人主未有其匹而少保公又以禮樂文章裨贊

熙洽之治此其時何時邪以故崇德報功興滅繼絕之典日見脩舉雖開國勛舊如常氏五侯廢弃百年者猶能復其爵祿如故而况宣聖神明之裔有不被其崇德象賢之澤者乎故曰雖有鎡基不如待時此之謂也先生授官而歸賓友周伯康者徵余言以贈乃述其遭際之盛告之且使其後世子孫知衣冠奉祀之所自云

栗齋曹先生配王孺人合葬墓誌銘

先生姓曹氏諱繼芳字維德別號栗齋世爲開封儀封人其先多隱德祖晟由隸史任保安州

判官父泰母韓氏繼母孫氏先生資性沉靜器
識弘密少即脩謹爲邑庠諸生履道冲素含和
內朗處物謙退若瞿瞿羞縮不能語及與人謀
事則盡心酌擬利害可不纖悉周至彌叩彌深
亦一時之清彥也累鄉舉不第乃喟然曰龍潛
豹伏古恒有之命矣養志丘樊與道爲徒豈不
足自怡乎遂泊然仕進探索墳記若將終歲焉
縣誌久廢缺先生乃援撫古今稽纂風俗闡發
幽微崇獎名德成若干卷名曰巨鏡覽識者韙
之里俗喪葬多惑於浮屠氏先生曰士者禮義

之會歸不爲鄉人倡其孰則之乃居喪一本諸
儒禮歛含祥禪一由其制無爽迄今士庶家慕
而行之正德十年二月二十三日以疾卒享年
四十有二先生疾且亟蓮渚孔永肅公問曰賡
志早沒寧無恨乎先生曰余何恨爲仲尼聖者
也歷七十餘聘不一遇命之值不值耳在聖且
然況餘人乎死生晝夜也山尚有頽海猶有涸
況人非金石可長存乎生不戾於道義足矣余
何恨爲遂偃然而逝嗟乎此亦可以觀先生矣
常記早年與先生同讀書僧寺日見先生與遊

士講方外之術予怪諏其所以先生指坐邊爐
曰茲光焰者火乎薪乎薪滅則火滅乃光尚何
存此形神有無生死之說也方士日脩者此耳
嗟乎不意先生乃不能壽遂使平生懷韞不得
少自槩見於世悲哉配王孺人淑慧恭順肅有
壺儀事舅姑親執烹飪縫衣不倦內外戚黨咸
宜之其助於先生者亦弘且多矣以嘉靖十四
年正月九日卒享年六十有五男子一誼爲儒
學諸生女子三一適予長子旒一適周復陽一
適袁孟夏孫男三知幾知化知微孫女二俱幼

浚川子曰自夫鄉舉里選之法廢士惟以言發
身苟無咕咕枝葉之詞以自致於科目則卒不
得大任由之閎才遠畧闇然陸沉者豈尠也哉
余於先生不能不爲之嘆息云先生沒葬青陵
祖塋且二十年矣今年改兆於縣北花谷之原
以某月日與王孺人合葬誼乃奔走千里至京
師乞銘銘曰

於維人才因事而見應龍弗躍孰測其變貞亮
者識裁割者斷含章未試何愧特彥被黼鳴玉
麟臺鳳闕流埃飄葉浮虛一轍亦何足屑靈氛

契契華原新阡哲士神遊閉玉九泉有媿斯延
視茲銘篇

政言贈賈國珍

儀封賈君國珍得慈谿簿請言於浚川子浚川
子曰古云一命之士苟志於愛民厥政必有可
觀此牧民者之要道魁柄也可不審所止乎曰
官卑不効奈何曰孔子爲委吏曰會計當爲乘
田曰牛羊壯長官惟其稱則厥職乃修無忝也
烏卑之爲厭夫人也位尊秩崇則責任重大使
厥才不勝戾而僨於事則爲竊據爲素飡即伐

檀君子之所弗與矣得無愧乎效亦不可以預
期也急於效則違道干譽何所不至使從容安
靜積以歲月則上無不獲而下無不信所謂不
足而有餘也夫何急之爲曰慈谿多貴人不能
盡悅其心將柰何曰子欲務求於外耶余見周
旋於人事者矣力有不及則得其一而失其二
甲乙重輕之間而怨誹之媒興豈非所自取乎
故曰求以正己終信於君子務以悅乎外適以
自壞賈君惕然曰儒雖不敏敢不服膺先生之
言以求寡過

明故朝議大夫山東布政使司叅議陳

公墓誌銘

公諱溥字一卿姓陳氏別號澹亭開封鄆陵人
漢太丘長文範先生之裔也鄆陵漢屬潁川郡
縣南漆井村故文範祠在焉陳氏至今世守之
六世祖諒仕元舉明經爲鄭州路學正諒生希
賢階登仕佐郎鐵冶都提舉希賢生灝官陰陽
訓術灝生翊翊生永清皆隱德弗仕永清生銓
號坦窩公之王父也少爲諸生博學弘德有聲
庠校當貢入禮部以公貴就封承德郎戶部主

事大學士臨穎賈公稱其正身率物有太丘之風毋程氏封太安人成化甲辰坦窩公夢天神髯而騎以金盤捧一兒曰上帝以此佳兒賜汝坦窩公拜而受之卽日生公公生而機穎中涵神智渙發恒莊重簡默不屑與群兒戲恂恂如老成人見者乃罔不異之總角卽爲邑庠諸生弘治辛酉赴鄉試監試御史先小試士以公未冠乃前列名故每試輒命公預每預輒在首選由是能文之聲滿梁豫間甲子鄉試中式乙丑登進士丁卯授大理寺評事時奄瑾擅權有事

非納賄不免於禍一浙江官部解 內府織段
瑾以無賄令刑官誣以侵盜公乃以減杖駁正
持之甚力奏入瑾大怒矯詔撻笞公仍左遷武
鄉縣丞公處之恬裕不以屈抑介懷日與武鄉
士講論墳索亶亶不厭由是武鄉科不乏人已
而擢尹陽曲陽曲附郭邑 宗室鎮守以無藝
擾索者無虛日公乃置民膏簿以籍其所需時
申報撫按乃咸懼其聞於上也遂不擾索民由
是大受其庇 晉端王雅尚文學重公少年才
傑常迎致府第講究古今庚午逆瑾伏誅公以

錄用廢滯晉戶部主事癸酉差權臨清舟稅時
寇掠之餘商船甚少稅鈔不逮常額或勸加稅
取盈公曰茲豈仁者之心哉剥商以成官吾不
忍爲也竟以少稅報乙亥陞員外郎尋陞郎中
奉 敕總理大同糧儲時內奄鎮守執舊例求
於公公持正不撓乃一切裁抑之奄恨乃侵公
公曰昔逆瑾枉一人之命我乃評反之雖被捶
掠濱死乃竟不肯從今欲我從汝耶汝視汝權
勢與昔瑾何如耶奄卒憚而敬之丁丑 武宗
毅皇帝北巡塞下從官大師何啻數萬人懼公

艱於度支公乃從容會計供需萬億固有不周
上嘉其能賜以綵幣進俸一級尋擢山東布政
司右叅議是年濱海大侵道殣相望公至冒雪
巡行設法賑貸所全活者不下數萬人然遂爲
海氣所襲病寒濕乃浩然有歸志或止之曰君
方壯年可懋爾勲伐以昭來世何遽求去公曰
人貴樂其性耳奔頓塵海何益於生所得未毫
銖所失已山阜矣乃累疏乞致仕以歸時年三
十五矣嗟乎浮雲富貴土苴軒冕公真有之若
水之勇退季鷹之早歸亦豈足多也哉公旣歸

乃遊心廖廓遺絕世務築臺於文範公祠左曰
聚星結亭於臺上曰聚賢與鄢之逸德耆善爲
五友會日談玄賦詩徜徉泉石間不復知人世
之有理亂不亦大雅明哲達乎肥遁超曠之域
乎哉丁酉正月十日以疾卒鄢之父老子弟無
問親疎咸罔不歎息泣下曰仁人逝矣得春秋
五十有四配趙氏淑惠貞靜卓有壹儀初封安
人晉封恭人男子四長斐登嘉靖乙未科進士
授中書舍人次臬次槩俱太學生女子一
適邑庠生牛尚性男孫一熈女孫一俱幼公平

生宅心仁恕動默合道口不言人過惡聞有議
人長短者輒止之使不得言與人真率易直不
作邊幅故人皆親愛之天性簡儉泊然無所嗜
好雖雅敬賓客而聲妓之奉未嘗一舉積書萬
卷而珍玩之物未嘗一畜興切遊覽而園池花
石未嘗泥情晚年乃號無欲子由是觀之信哉
中書君卜以是年十二月一日將葬公於栖良
村祖塋之原乃命臬走京師請銘浚川子與澹
亭雅相善義宜銘銘曰

道習日降兮貞義隕裂競利趨時兮孰恢其節

偉哉哲人兮脫屣朝列潛休匿彩兮匹古高潔
山韞鴻蒙兮川流長有子才彥兮邦之光雖弗
究厥施兮遺後之昌百世而可稽兮視茲銘章
明故 敕封文林郎都察院司務常公

墓誌銘

嘉靖十五年二月三十日封文林郎都察院司
務常公卒於正寢子戶科都給事中序奉其友
刑科都給事中田君少生之狀泣血請銘玄堂
之石浚川子於都諫君雅有師生之義宜爲銘
按狀公諱天胤字希之別號白屋山人晚攝西

亭居之人復稱之曰西亭先生其先薊人也國
初徙棠邑遂家焉蓋自從政始是爲公之高祖
從政生顯顯生佐佐生鯨世有隱德初母甯夫
人之脈公也有異蛇蜿蜒鼎上馴馴如家畜麾
之不去去而復來里人異之未幾誕公岐嶷秀
茁望見之者知爲奇異比長剛方恢廓雅有大
志博涉墳典才慧敏贍爲文章不甚搆思下筆
輒數千言不輟治尚書爲學官弟子茂有時譽
領弘治乙卯鄉薦高第會試凡七舉皆不得志
於有司公歎曰志士乃爾邪其命也夫乃始赴

銓曹試其文在優等授都察院司務銓法司務
非首選不授臺院職風紀視部寺尤重因以授
公居數年廉慎如一日凜凜可式諸司矣於人
不爲姘阿雖貴官大人有弗循於法理亦面折
不避故士大夫莫不憚其峻直而服其持正時
有錢經歷者阿附貪鄙人也公心每輕之乃銜
公數中公於權勢所公慨然曰側媚委順豈吾
之時虓虎耽耽不去殆將噬人况養素山藪有
至樂之道藏名江海得保身之休乎乃䟽病乞
歸歸事其二人盡孝日得其歡心邑之人多式

之時公之年亦及始衰非終身慕者而能若是
耶公性仁愛里之人有貧無依者無論識不識
卽出粟調之而親黨尤賴焉有流離者且死公
乃具棺斂葬之其妻請爲奴公曰不可葬憫汝
也奴則利汝矣乃擇里民之良者妻之今爲白
啓之妻云初序爲廬陵令時以述職入 覲歸
便省公適公疾侍膝下不忍去公中夜起捫之
且諭之曰古有云道之所貴者理世也人之所
美者及時也昔吾施未究深負 國家養士之
恩所賴有汝耳况忠於君以成其親是之謂孝

乃今效兒女子戀戀小節豈吾之望於汝者乎
夫報不竟於其身而復責其成於子謂之貞忠
者非耶公生於成化六年六月七日距今享年
六十有七配宋氏有女行先公卒贈孺人繼配
張氏范氏男子三長曰庚邑庠諸生以恩例
授冠帶次即序登嘉靖癸未科進士授江西廬
陵縣知縣入補兵科給事中陞本科左給事中
今陞戶科都給事中皆宋出次廊習舉子業才
雋有遠望范出女子一適冠邑庠生王錠孫男
二臨冬憶春孫女六嗟乎守義抱貞不以世故

夷險變其節非得于天而懋于學者不能鴻鵠
之志困於燕雀拔俗嘉魂之節格於時命落落
而難合有道者亦付之不偶焉耳矣重我性分
奚足怨尤公也美其道弗究其施要之修諸已
者無所毀蝕將異世弗可泯也已况有子以述
其志業與諸自奮何異亦可以自慰矣卜以其
年某月日葬城南三里之原從新兆也銘曰
進弗競厥榮退弗珍厥聲抱謙不盈公之平生
立於澹泊之途達夫變化之故確乎不拔公之
貞固有子才傑拾遺補闕函夏被其澤公之餘

烈

送管君一初擢江西按察司副使序

戶科都給事中管君一初擢江西按察司副使
同官王君少儀戴君淑似以贈言問余曰一初
之在諫垣好脩而特立者也其學淵然其才裕
然其氣浩然其志廓然其論天下事利害幾宜
適義當物犁然如指諸掌乃今以外補而去豈
獨僚寀邀德寡式而 朝廷之上殊失耳目之
臣矣君子蓋重惜之且夫敷外以和民不如給
事 內庭進思盡忠之爲愈也執憲以標世不

如拾遺補過正本澄源之爲急也子曷惠之言
浚川子曰嘻古之爲道者惟求諸已而已矣養
性情欲其合天明義利欲其懋德察物理欲其
畜才天合者衷無不和矣德懋者行無不完矣
才畜者物無不濟矣以是而御世則不期而應
不言而信不謀而成此謂之道術此謂之神感
是豈假藉於外乎哉使不幸而不邁於時則付
之命亦守道而不變焉是故不爲卑諂不爲嬖
阿不爲銛取不爲賄誘不爲械陷之巧不爲媚
妬之鑿不爲競勝之詆亦無驕吝亦無強執亦

無自大亦無銜飾亦無與俗渾垢亦無與不知
道者較高下故得之不驚失之不驚蓋有樂天
知命遁世無悶者矣豈非君子之盛節乎不然
道術雖能濟物乃於得失利害猶繫於心亦有
道者之所不與矣一初將於是圖之可乎夫造
化生而爲人亦大難矣人而靈慧才智爲尤難
惟夫大人君子養德弘道經世宰物爲天理民
彝之主故能身名並立通宇宙而不朽使區區
焉迷瞶於富貴勢利之塗雖一時榮炳可驚可
愕而其大者無所託附於後世其不爲蟻蠊蜉

螭之起滅者幾希古之人所以終日乾乾進脩而不息者豈不以是乎哉一初其圖之

明故封奉政大夫刑部郎中楊公墓誌

銘

公諱文秀字廷英姓楊氏開封杞人也曾祖驥祖賢父溥俱晦遁不仕母閻氏公甫垂髫祖母父母並喪無他兄弟戶以虧負官輸不貲乃易產陪償遂伶俜窘乏困於生理公乃強力自植不爲刺促態少長學小賈中年致大賈然亦即棄去常曰賈乃丈夫賤行也不若務農力本

乃買田沙河之陽稍稍漸廣晚至數千畝楊氏之業遂稱饒益恒居河上自謂河曲老人終歲不一二造城府時時從田父省稼穡班荆道舊爲樂性不喜飲酒鄉隣每具食候不論貧富踈戚輒往盡歡熙熙由由乃真義農以上人矣平生尚義氣重廉讓不肯以纖微負人見豪奪巨吞恣暴凌迫孤弱者必面折詆之及與衆處恒恐恐如有所傷其待親戚尤懇惻有義雖至踈遠皆有所稱必曰某伯叔某丈至白首不改嗟乎公可謂篤行君子矣以子本仁貴累封刑部

郎中嘉靖十六年七月十五日卒得春秋六十
有三配馬氏累贈安人未歸公時聞舅姑計乃
悲痛飲泣執爲婦之禮父母怪其然安人曰所
學爲女子者養舅姑也今亡矣吾誰養乎旣歸
公家徒四壁乃盡脫其簪珥資公自惡服食力
作故楊氏初業復振安人有助焉嘉靖二年閏
四月八日卒得春秋四十有九繼配李氏累封
安人男子三長即本仁登嘉靖八年進士歷官
工部都水司主事刑部湖廣司郎中博極墳籍
希心道岸清淳亮直卓有雅度而深識遠畧尤

堪大受焉次本義國子生次本孝縣學生早卒
女子三俱夭孫男二大韶大武女二俱幼嗟乎
傳有云富爲上貴次之何貴乃次夫人以適性
爲美通名仕籍顯以適矣然而王事裨我官守
不可曠而法紀不可越憂勞沾培之虞隨之矣
厚積於家則施予可以仁物以有易無隨所意
欲而無不可得美與貴埒無貴之患豈非上邪
公運厥才智乃賈乃農以致豐富又能教其子
以高亢其宗閥陶朱刁間之徒執一偏以利生
者不可同日論矣故君子於公之所能每繫於

心要亦賢智之儔也以其年某月日與馬安人
合葬於城南新塋之兆本仁以鄉進士陳君卜
之狀來乞銘公一鄉善士也不可無述以掩幽
隧乃爲之銘銘曰

頓伏而起才之捷韋布而封善之獲後昆昌其
業猶夫餘烈

明故萊縣儒學訓導林菴周君墓碑銘

君姓周氏諱尚忠字本誠別號林菴菴濟南人八
九歲時出就外傳醇雅機辯卽爲父師所稱十
二爲邑庠諸生提學臬公試其文雄健整贍可

以上造甚奇之早喪母卽痛慕不飲酒食肉者
五年弘治壬子歲凶鄉閭貧乏貸而不能償者
君卽勸其祖悉其券焚之有群聚爲盜者過其
廬乃相戒曰勿驚周先生翌日遇群盜于塗值
雨泥淖盜扶君騎相送乃不疑君豈非仁者愛
人之徵乎通毛詩齊魯之士從學者先後幾五
六百人顯於仕者甚衆爲文根據理致不藻飾
以馴時好故歷試於鄉不舉嘉靖丙戌始貢於
禮部遂以教職例謁吏部選授河南某縣訓導
君乃敦崇弦誦弘獎博雅以持敬爲道室以經

術爲士業講解墳索覽覽無倦業士乃雲集景
從欣然以爲得師居三年慨然有尊鱸之思乃
投牒告歸安貧耽道志不苟營草野閑寂怡然
自足豈抑天性貞定歲寒不移者乎嘉靖丙申
五月四日以疾卒得壽七十有四始祖政良元
至正初以淘金官來歷下居大清河河北遂家焉
曾祖海祖祥父王母盧氏配胥氏男子三居邨
邑庠生居岐嘉靖乙酉鄉舉中式居魯由太學
生嘉靖甲午順天鄉舉中式女子一適趙孟芳
孫男二六藝六學俱業儒孫女三俱幼曾孫男

一嗟乎馳騫之才終快於遠游道素之流恒託
於寥廓自非樂天知命孰能不嚮懷榮艷而憤
悒於垂翮哉君乃脫屣祿仕還同韋布跡其所
行察其所安雖古高尚之流殆不是過又能與
三子傳經濟上爲一時儒者所宗貞風逸躅已
足垂遠况諸子奇才懋學秀軼流品行將華國
匡時以彰君之德弘且遠乎故曰德盈必伸不
于其身于其後人周君以之以次年二月二十
四日上葬於五頂山之原其子居魯匍匐泣血
走京師請銘其墓碑予往督山東學時與周君

有一日之雅義宜銘銘曰

彼進取者龍躍雲游逸士超曠獨與靜休各任
道真匪曰寡謀自非朗識孰契玄修嗟嗟周子
耽幽味道澹泊與宅藏珍滅耀子州讓王園公
養皓豈其抗志從吾攸好厥積皇皇厥施未光
有子才彥亦奚足傷濟山崔崔濟水洋洋佳城
蔭祥周氏之昌

祭孫平泉年兄文

嘉靖十六年歲次丁酉十月某朔某日少傅兼
太子太傅吏部尚書兼華蓋殿大學士李時戶

部左侍郎唐胄太子少保兵部尚書兼都察院
左都御史王廷相工部尚書兼翰林院學士溫
仁和戶部尚書兼翰林院學士李廷相謹以牲
帛庶羞致祭于 平泉孫先生年兄之靈曰嗟
乎先生天挺殊才秀穎英發作爲文章機軸自
我古有墳索不假紹藉俄頃搆思千言立成人
所窘迫先生從容人所不足先生有餘隨模賦
形變化無定格調離塵思致奧古至有讀之三
數不能通其義者不亦文乎哉由是掇魁及第
騰聲翰圀爲一時文士所羨宜矣其曾次超洒

風流曠逸適性而往不作拘囚視兢兢守度者
若悶困我若苦亟我者其亦嵇阮之流乎處人
無大小衆寡賢俗誠狡苟以修好而至即吐心
相與無所嫌避有包韞垢疾之量而無賢不肖
取舍之心殆含光渾世不微名檢近有道者之
貞觀乎由是觀之先生之得於天者亦厚矣哉
假天益以玉汝於成之惠使之持論強志達於
斟酌劑量之域由是而之焉將亦何所不至顧
乃與之以異質而不與之以難老畀之以美才
而不畀之以遠到卒使遭讒罹禍無所於解述

遭跋扈困躋孤危栖栖焉賡志而沒豈不悲哉
天之意亦憇然爾矣雖然朝菌之於靈椿蜉蝣
之於遼鶴委吏之於臺省雖脩短榮枯於是乎
不齊先化者之視後化均一澌滅爭一間耳况
先生之所得者殊絕出類亦足以懋昭於世而
又何憾乎哉某等年同甲科義切兄弟祖章適
野永隔幽明揮淚泑泑薦詞陳俎靈明有格庶
幾監茲尚饗

明故中憲大夫贊治尹都察院右僉都
御史研岡杜公墓誌銘

嘉靖十七年七月十三日都察院右僉都御史
杜公卒於位朝大夫士無問大小咸曰哲人亡
矣莫不歎息傷悼至於泣下 皇上以公久在
近侍乃 敕有司 諭祭公將昇柩歸葬同鄉
諸君子以廷相於公有僚采之雅乃以隧銘屬
按狀公諱拂字子才別號研岡開封臨潁人也
高祖寧曾祖獻祖文世有隱德父進九江府通
判以公貴封奉政大夫通政使司左叅議母姚
氏封安人正德丙子鄉舉中式辛巳登進士第
授戶部廣東司主事改兵部職方司主事陞通

政使司右叅議歷陞左右通政都察院右僉都御史履順居易序進超特不十數年便登卿貳亦通顯哉公少穎敏博涉墳記罔不契其統旨與其弟桐治毛詩爲舉子業並有聲汝潁間大學士南塢賈公甚奇之以爲中州冠冕在此公神鑒深沉志慮遠暢不見其砥礪名檢而動悉合道不事乎亢烈論議而言皆中節事有所不可爲雖奴隸不爲之欺道有所不可渝雖三公不爲之移且處之從容弗迂弗激而終不失正以故朝野佇望鬱爲時英好修之士斯焉取式

矣且天性孝友居京師弗獲迎養母氏每得四方水陸珍品四時綺縠衣著乃不遠千里致之左右弟黃門郎性行曠逸才調朗拔以多口不理爲時所棄公見等儕日貴每惜其以才賢被抑而痛恨於執政者之罔公又每稱其才藝出衆自以弗如遜而下之非孝愛之至其孰能與於此嘗以文不載道不足傳世詞不古雅雖傳弗久每於飾格命意以茲爲準而風雅左氏先秦之調恒數數焉故其文醇正典則無佻率嶮怪之病足以力追古人而與之頡及丙申之後

乃益以奔放弘肆有長江大河波瀾浩渺洋洋東注不可抵遏之勢嗟乎文之變致極矣故一時知言者咸推宗之所著有研岡集若干卷行於世配谷氏封安人繼配康氏封恭人男子二可仕可久俱太學生女子三俱幼孫男二寶臨芝祥孫女一聘生員黃玉公生於弘治二年至卒之年得壽五十以嘉靖某年某月日葬於縣之某原浚川子曰履貞懷德徵於輔世之賢深養厚積達諸蒞政之實此非有諸內形諸外者之自然歟以研岡學術閱膽才行充拓經世和

人何施不可顧乃終於清街無事可見如進納
言曰惟敷奏繼陳臺永翼佐而已明珠韞匱空懷
照乘之光良驥伏櫪未騁千里之足乃天遽奪
其年識者恨之雖然巨論宏詞焜耀星日哲人
心事曠世如覩使研岡歿而不亡者其在是乎
乃爲之銘銘曰

嗟乎研岡天畀之良偉步貞修厥世之望不丕
令德允矣大受龍翔鳳啗希世而有天胡殄毒
豪賢雅之世方瞻企中道而梏徒昌其文未究
厥施豈造物者忌物之全勝而陰有所靳歟

內臺集卷之六終

內臺集卷之七目錄

雜文

表奏十四首

內臺集卷之七目錄終

內臺集卷之七

浚川王廷相著

後學王光濟門人劉希杜校

雜文 表奏十四首

謝 九廟 獻帝廟成 賜銀幣表

奏爲謝

恩事嘉靖十五年十一月十九日恭遇

皇上修建

太廟及

獻帝廟工完 賜臣花銀三十兩青綠紵絲二

表裏臣謹就私家望

闕叩頭祇領者伏以周室追王崇先之孝達
漢京別廟尊禰之情深政以人存非

元聖孰稽諸古禮緣義起惟

至德乃合乎天昭贊洪圖恢張異數今時快覩
往跡有徵恭惟

皇帝陛下

道洽人倫

德循帝則

純王師古

聖學憲天以

九廟之未營爲

聖朝之缺典念

獻宮之創建尚

神栖之靡安乃欲釐舊更新謀及卿士遂致龜

從著協上符

帝猷繼申敕乎司空卽大恢乎經制蓋

聰明睿智之

聖獨見其然非

仁孝誠敬之心無以至此邇者未幾再歲大工

告成

殿寢森嚴

神靈安妥規畫億萬咸出

聖心氣象高明迥符

天造制殊同室祭各伸其所尊義重本生禮無
嫌於獨享衣冠以遊視原廟之制陋享
嘗乃止知二祧之議踈豈惟古先王之
禮復見于今亦仰

大聖人之作度越於衆臣猥以微眇之勞獲被
汪洋之

賜門衷知愧報

德無由伏願

歲祫時享垂祭統於無疆

聖子神孫主灌鬯於有永臣無任感
恩戴

聖激切屏營之至

謝 賜奉安 三后神主銀幣表

奏爲謝

恩事嘉靖十五年十月二十七日恭遇

皇上奉安

三后神主於

裕陵

茂陵臣叨與扈衛行營之列伏蒙

聖恩賜臣花銀二十兩青羅一表裏者切以君
行師從有國者之至計文事武備謀政
者之先圖臣非材常品何補於臨戎緩
帶輕裘徒榮於有事虞蒙

珍賚彌荷

鴻私受福罔功願報容而汗背酬

恩無地誓刻骨以銘心臣不勝感戴

天恩之至

謝

扈從秋祭 山陵賜銀幣表

奏爲謝

恩事嘉靖十五年九月二十一日恭遇

皇上秋祀

祖陵臣以提督營務翊衛

行宮伏蒙

聖恩賜臣花銀二十兩青羅一表裏者恭惟
皇上禮洽幽明

孝通天地感霜露之載零躬

陵園之祭掃師旅有嚴謹

法駕于征之衛夙夜匪懈供臣子職分之常
詎意犬馬之勞濫冒丘山之

賞祗受汗顏揣量驚骨沾濡如雨難酬

大造之仁宛轉隨陽益切傾葵之報除瞻望
行宮叩頭外臣無任感戴

天恩之至

謝祈雪 賜脯醢酒果表

奏爲謝

恩事嘉靖十四年十二月二十八日恭遇

皇上祈雪祭告

上帝六神於

殿陛收回脯醢酒果荷蒙

聖恩頒賜於臣者 賁出九天光生三事臣誠

懽誠忭稽首頓首伏以天人相感允協

風雨之調年穀順成用享和平之治恭

惟

皇上仁覆率土

德通上玄

加意黎元

留神國計以雪澤之未敷恐麤蕪之缺望乃
齋心淪慮祈

上帝以惠民

躬祀精禋藉群神而助化既默禱於宮中復
露告於

殿陛切商湯閔雨之心邁周宣憂旱之舉黍
稷之馨已昭假乎冥漠登豆之餼遂

頒及乎臣工薦祖考以有榮咀滋味而增
壽臣猥從朝列得被沾濡仰荷

恩慈何勝慶幸雖陽春之德浩蕩難名而寸草

之心圖報恒切伏願騰六效靈早見豐
穰之瑞烝民率育不獨卿士之懽臣無
任感戴

天恩之至

謝 皇子誕生告 郊丘內殿畢 賜

脯醢酒果表

奏爲謝

恩事嘉靖十五年十月九日恭遇

皇子誕生

皇上祭告

上帝

祖考臣叨與陪拜禮成伏蒙

聖恩以脯醢果品 頒賜於臣者伏以前星發

耀允惟

主鬯之徵離照兩明快覩

重華之慶千靈呈瑞萬國以貞恭惟

皇上續

祖洪圖受

天明命珍掄女士篤育

元良以

皇天眷佑乃報德於

園丘仰

祖考垂休復告禋於

內殿懽騰

宮壺喜溢臣民臣謬從展拜之班得被

神明之惠豈直荷榮於俎豆式深喜動乎心神
伏願熊羆入夢衍惟百子之休松栢同
春敬致千秋之祝臣無任感

恩忻忭之至

辭免加陞太子少保

奏爲辭免加陞 宮秩事 今月十五日該吏部題爲散官事奉

聖旨王廷相加陞太子少保照舊辦事者臣仰承

恩命踰躡等資慚懼周章莫知攸處臣誠惶誠恐稽首頓首伏念臣本草茅謬叅流品叨承任使累歷崇階乃緣奏績之常輒荷

寵靈之大

恩加非據祇受罔功恭惟

皇上

動符乾德

幽贊神明

光闡鴻猷

精通至道

萬機獨斷

庶政允修

鑒別日融

恢張天覆乃若

文思聖敬已懋躬行而於邦紀民彝尤深注意

蓋堯舜之重華而明良之景運也臣兩
遭棄非久辱泥途一遇

聖慈遂蒙甄獎不數年來晉登朝列既歷試諸
兵務復總攝平臺綱素食兩京忽焉六
載方憂鰥職伏俟譴罰詎意

溫綸更加

官保切以文章德器斯堪

青幄之賢閎博端詳方稱

東朝之選臣何片美遽爾濫膺揣分循涯極
知不可伏望

皇上洞開玄鑒俯察愚衷重惜清班寢收

成命臣不勝感戴

天恩之至
謝 賜飛魚紗衣表

奏爲謝

恩事嘉靖十五年四月十八日欽蒙

聖恩賜臣大紅飛魚紗衣一件者臣仰承
恩賚無任光榮感荷遭逢慚無報稱恭惟

皇上

化侔天運

道協聖真

達孝遵

親至仁育物感雨露之沾濡躬

陵園之展

謁禮雖循乎

舊典敬實本於因心萬物懽忻百靈擁衛乃於
扈從之臣時有衣袍之

錫臣偶緣執事輒爾承休身被文錦徒羨如雲
心比蟲魚無能報海敢不益勵忠勤用

酬

慈惠雖稱襍線之才竊冀

衮裳之補臣不勝感戴

天恩之至

謝 賜銀幣湯藥表

奏爲謝

恩事 今月二十四日欽蒙

聖諭團營提督內外官爾督率武士

扈蹕辛勤特賜慰諭爾等宜用心管率軍士

勿怠欽此欽遵復蒙

賜臣青雲羅一疋紅生絹一疋銀二十兩生脉

湯一劑臣荷戴

恩私極知濫冒誠惶誠恐稽首頓首仰惟

皇上修謁

陵殿至孝崇

先預建

玄宮

聖懷達道躬蒙

法駕歷視

壽山朝野臣民靡不忻睹臣猥司戎務綜理行

營職分當然敢言辛苦伏蒙

諭旨下臨心神惶悸銀羅載

賜益被光榮况藥餌出

上方之珍服食有潤燥之力臣日來三焦違攝
喉脂失清當夜飲服侵晨即愈如有神
靈之助難名

天地之仁古人以咳唾爲恩况此乃駢蕃之
賚撫臆銘心實深感激敢不益勵忠勤用圖報
稱致夙夜匪懈之誠期翊衛無虞之効
除望

行宮叩頭祇領外臣不勝感

恩戴

聖款迫屏營之至

謝 皇史宬工訖賜表裏銀兩表

奏爲謝

恩事嘉靖十五年七月二十五日伏蒙

聖恩以建造

皇史宬工完欽

賜臣花銀二十五兩紵絲二表裏者珍頒

御帑仰荷

皇慈監及靡功寔深慚汗除望

闕叩頭外臣誠惶誠恐稽首頓首伏以太平
有象式昭邁古之功王道無私類有旁
流之澤遭逢非易榮寵曷勝恭惟

皇上法乾承運與治同途孝敬崇

先文明御極慨

累朝之實錄大可侔天念

列聖之遺文久當傳世使非崇重何罄瞻依乃
圖石室金匱之藏遂有

寶閣瓊成之建規畫精巧真絕地以通天氣
象軒我願超前而掩後及告靈臺不日

之成乃舉周王大賚之典群工巨細咸
被沾濡少涉勤勞無論非次臣未由執
事獲効駮奔徒以提督營務之名輒冒
經理

大工之賞蓋成事以因人實捫衷而知愧

恩私優假浩蕩難名縱竭駑蹇之才莫稱涓涯
之報伏願神符嵩祝永膺萬壽之祥夢
協熊羆早遂多男之慶臣無任感

恩戴

聖忭躍屏營之至

謝 山陵行宮告成 賜銀幣表

奏爲謝

恩事嘉靖十七年五月八日恭遇

山陵

感恩殿等工告成伏蒙

聖恩賜臣花銀三十兩綵羅三表裏者臣稽首
頓首上言祭建

行宮已遂

聖心之孝

賞頒中帑寔增臣子之榮禮踰百朋

恩深九地伏念臣職專臺憲銜列本兵役卒雖其所司工程原非管理計稱事無絲髮之勞論酬功濫駢蕃之澤晶晶金寶韞簾匱以潤家燦燦衣裳被文繡而華體在顏有醜揣分非宜茲蓋伏遇

皇上

至仁天覆

洪造海涵禮出異常功疑惟重但効勤於織芥卽錄勸其工能感激

寵綏銘鏤心骨臣敢不對揚

慈惠永懷圖報之誠策勵疲篤益懋匪躬之節

除望

闕叩頭祇領外臣無任感戴

天恩之至

謝 慈寧宮工成 賜銀兩表裏表

奏爲謝

恩事嘉靖十七年七月二十七日恭遇

慈寧宮工完荷蒙

聖恩賜臣花銀五十兩紵絲四表裏謹於私第

望

闕叩頭祇領者伏以

慈仁懋賞朽敝叨榮祇服

寵私實深愧悸恭惟

皇上明倫率世至愛尊

親大建

慈宮用伸

聖孝爰居爰處仰惟堯輩之安美與美輪佇見
神情之懌茲以

大工告成用頒

恩典百凡効力均被

寵光伏念臣徒備提督之列罔偕奔走之勞乃
隨例以有榮顧職思而益懼雖

昊天曠蕩不分雨露之濡而寸草纖微難竭涓
埃之報臣無任感

恩戴

聖激切屏營之至

辭加陞太子太保

奏爲辭免陞秩事嘉靖十八年三月十六日
該吏部爲給由事題奉

聖旨王廷相積有年勞陞太子太保兼官掌院

如舊臣聞

命自天感愧交集謹稽首頓首上言切以

東朝保傳寔

青宮之峻資一品勲階乃人臣之罕遇

寵靈忽被跼踖靡安敢布下忱仰祈

洪造伏念臣素無學術徒積年勞日減聰明漸

成衰鈍蒙

聖明之誤簡蕪臺省而竝榮久矣妨賢誠哉竊
位九載之績弗成方虞顯黜三考之法
無貸敢望超遷詎意

聖慈復隆

眷獎藏疾韞垢天容海涵小物曲成

至仁同體弗置汰歸之例更施陞秩之

恩分數非常遭逢不偶匪惟叨冒終懼顛隳伏

望

皇上俯鑒愚衷特廻

綸旨寢茲新擢俾守舊官庶安止足之心獲免

過分之咎臣不勝感戴

天恩之至等因奏奉

聖旨卿學行素著宮保重秩特茲簡授宜盡心

供職不允所辭吏部知道欽此

謝秋祭 山陵賜銀幣表

奏爲謝

恩事今月二十六日恭遇

皇上秋祭

山陵以臣叨在翼衛之列伏蒙

賜臣花銀二十兩紵絲一表裏者切以

惠澤旁流仰

聖恩之罔極

寵綏恒被知

天眷之彌隆顧此駑駘謬克任使雖承

天光下濟之輝殊無地道代成之美臨榮負愧

報

德難圖除望

行宮叩頭祗領外臣不勝感戴

天恩之至

辭兵部尚書

奏爲乞

恩辭免重任事嘉靖十三年二月初六日該兵
部題爲陳愚策以安內攘外事節奉

聖旨王廷相陞兵部尚書兼都察院左都御史
提督團營軍務仍掌管院事寫敕與他欽此

臣仰蒙

洪造眷注下及感荷

恩私飛動心魄臣誠惶誠恐稽首頓首謹披瀝
愚衷仰乞

天聽切惟尚書八座祿秩崇階兵政九伐

朝廷重寄使掄選非人則關係不小矧邇者
驕卒倡逆狂虜擾邊寇迫門庭議急戎
馬必須撥亂濟時之賢斯建內修外攘

之績如臣者才非超衆命偶際時自擢
任都臺以來恐負

皇上知人之明恒存夙夜匪懈之節方期圖報
之未能遽荷

寵榮之再及但懼鷄雀翔飛難致鷗鵬之運駑
駘蹇步不堪良駿之程使臣覲顏而居
終致覆餗之咎伏望

聖慈收回

成命妙簡時賢授此重託容臣照舊供職勉圖
報稱庶經國有得賢之榮而在位免濫

竽之誚臣無任感戴

天恩之至奏奉

聖旨卿才猷素著團營重務特茲簡任宜效忠誠以副委託所辭不允該部知道

內臺集卷之七終